

**Nunatsinni meeravissartaarniartut angalanermut, ineqarnermut nerisaqarnermullu aningaasartuutit taarsiivigineqarsinnaanerit periarfissarsiuqqarsinnaanera pillugu apeqquteqaat aallaavigalugu oqallisissiaq.**

(Inatsisartunut ilaasortaq, Mikivisuk Thomassen, Inuit Ataqatigiit)

**Akissuteqaat**

(Isumaginninnermut, Ilaqutariinnut Inatsisinillu Atuutsitsinermut Naalakkersuisoq)

Aallarniutigalugu Naalakkersuisut Inatsisartunut ilaasortaq Mikivisuk Thomassen, Inuit Ataqatigiit, meeravissartaarnerup ukkatarineqarnissaanut nunatsinnilu inoorlaanik meeravissartaartarneq pillugu paasitseqataanissamut periarfissiimmat qujaffigerusuppaat.

Angajoqqaat meerassartik imaluunniit meerartaartik inoorlaaq meeravissiarineqalissasoq aalajangerunik, aalajangiutivinnginnerani angajoqqaat eqqarsarluarnissamut piffissaqarnissaat siullertut pingaartuuvoq. Taamaattumik angajoqqaat meeravissiangortitsinissaminnut siusinnerpaamik meeraq pingasunik qaammateqalerpat akuersisinnaapput. Aatsaat taamaalippat meeravissartaartussat meeraq pisortatigoortumik tigusinnaavaat. Aamma tamanna meeqqamut pitsaanerpaassaaq.

Taamaalinissaata tungaanut meeraq meeqqanut paaqqinniffimmut angajoqqaarsiatulluunniit paarsisunut nalinginnaasumik inissineqartarpoq. Angajoqqaarsiatut paarsissuusut ilaannikkut aamma meeravissartaartussaasinnaapput.

Meeravissartaartussat meeravissartaassartik inoorlaaq aallugu angalassagunik taamaattumik angajoqqaarsiatut paarsisussat imaluunniit meeqqamut qaammatit pingasut sinnerlugit utoqqaassusillimmut meeravissartaarlutik angajoqqaarsiatut angalassapput. Angajoqqaarsiatut paarsisussat angalappata angalanermi aningaasartuutit kommunit matuneqassapput. Angajoqqaarsiatut meeraavissartaartussat angalagunik angalanermut aningaasartuutinut matussutissanut 36.000 kr. tikillugit tapiissutisinnapput.

Siunnersuuteqartup oqaatigaa meeravissartaartut meerartaartutulli aallatut pineqassasut, tassunga ilanngullugu meeravissartaartut meeqqamik ernisumik illoqarfeqateqarsinnaassasut. Tassunga atatillugu erseqqissarneqassaaq meeravissartaartussat imaluunniit angajoqqaarsiatut paarsisussat erninermut namminermut aallaavittut peqataasinnaangimmata.

Meeqqamik meeravissiangortitsinissamik aalajangerneq oqitsuunngilaq. Naarmioreerlugu erniareerlugu anaanangorlaap meeqqani erniareqqammikkani inuulluaqqussavaa. Ilutigitillugu ataataasoq pisumit aamma sunnertissimassasoq eqqarsaatigisariaqarpoq. Anaanaasup erninermut peqataasussamik nammineq aalajangiisinnaanera pingaartuuvoq, soorlu aamma piffissaq tullinnguuttoq qajassuartumik ataqinartumillu ingerlassasoq, tassunga ilaalluni angajoqqaanngorlaat meeqqamik eqqissillutik inuulluaqqusinissaminnut periarfissineqarnissaat.

Angajoqqaanngorlaat meeravissartaartussat qilanaartut taamaammatt naapittariaqanngilaat, tassami meerassamik taassuma angerlaannissaa qilanaarisimavaat. Ingerlanissaa sapinngisamik qajassuartumik aqqissorneqartariaqarpoq, pingaartumik angajoqqaajusut isumartik allanngortippassuk meeraq tigungmiinnarusullugu. Taamaattumik ernisarfirmitt

aallersoq tassaasariaqarpoq ingerlatsivimmeersoq meeqqap inunnut eqqortunut  
tunniunneqarnissaanik isumaginnittoq.

Taamatut oqaaseqarlutik Naalakkersuisut oqallilluartoqarnissaa qilanaaraat.